



mjesečni Bilten



april
travanj
2021

omladinska mreža bosne i hercegovine

263

Dragi prijatelji/ce,


Predstavljamo vam **aprilsko** izdanje (**263**) mjesečnog informativnog Biltena Omladinskog resursnog centra (ORC) Tuzla i Omladinske mreže Bosne i Hercegovine, koja za sada broji **186** organizacija i **115** pojedinaca iz **75** mjesta BiH.

Bilten trenutno izlazi na bosanskom-srpskom-hrvatskom i engleskom jeziku.

Bilten sadrži informacije o radu Omladinskog resursnog centra (ORC-a) Tuzla, mjesečne aktivnosti omladinskih organizacija, neformalnih grupa i pojedinaca - članova Omladinske mreže Bosne i Hercegovine, njihove planove za naredni period i ostale korisne obavijesti namijenjene mladima i NVO sektoru (donatorski pozivi za projekte, konferencije, seminare, školarine, stipendije i sl.).

Ukoliko želite da budete na mailing listi za naredna izdanja mjesečnog informativnog Biltena, ili ako imate pitanja ili sugestije, javite nam se. Mjesečni informativni Bilten, kao i arhivu dosadašnjih izdanja možete naći i na web stranici Omladinske mreže Bosne i Hercegovine:

www.omladina-bih.net



SADRŽAJ

Aktivnosti u aprilu.....	2
Planovi za maj	7
Aktivnosti članova mreže	8
Saopštenja/informacije/donatori/pozivi	22

Uživajte u čitanju!

AKTIVNOSTI ORC/HCA U APRILU 2021.


ALF Virtualni maraton za dijalog u EuroMed regiji



Anna Lindh Fondacija Bosanskohercegovačka mreža

ORC Tuzla je, kao Glavna kancelarija ALF Mreže u BiH, a u okviru ALF Virtualnog maratona za dijalog u EuroMed regiji, u četvrtak, 29. aprila organizovala E-table (virtuelni okrugli sto) sa temom:

Rad organizacija civilnog društva tokom COVID-19 pandemije – Katastrofa, izazov ili prilika? Kako dalje?"



Na Okruglom stolu učestvovalo je 16 učesnika iz: BiH, Libana, Slovenije, Egipta, Albanije, Bugarske i Mađarske, a govornici su bili:

Slobodan BLAGOVČANIN – CAT BiH

Dimitrios CAVOURAS – Ekspert za civilno društvo EuroMed regije i

Robert KRIŽANIĆ – Šef ALF mreže Slovenije

Na okruglom stolu se razgovaralo o: Slabostima i snazi organizacija civilnog društva u EuroMed regiji tokom pandemije, dobrim i inovativnim aktivnostima koje su organizacije pokrenule tokom pandemije, iskustva i prevazilaženje izazova i prepreka, mogući prijedlozi o radu ALF Mreže unutar pandemije (mogućnosti, izazovi, rješenja i mogućnosti).

Učesnici su tokom dva i po sata imali priliku razmijeniti svoja iskustva, razmišljanja, ideje, problem i poteškoće unutar pandemije. Razgovaralo se i o tome kako organizacije civilnog društva učiniti više aktivnim u društvu, kako povećati vizibilnost, kako popuniti praznine u radu vlada i donosioca odluka u borbi sa pandemijom, kako se boriti protiv lažnih vijesti (Fake news)...

Jedan od zaključaka okruglog stola bio je pojačati i djelovati proaktivnije on-line djelovaje (kako zvanično – unutar ALF mreže, tako i u razmjeni iskustava između zemalja i članica)

Uskoro očekujte potpun izvještaj E-stola.

CAT – Bosna i Hercegovina

Tokom mjeseca aprila, nastavili smo sa našim redovnim aktivnostima u sklopu projekta „CAT – Bosna i Hercegovina“.

Naše mačke su nastavile da oduševljavaju javnost na društvenim mrežama.

Ukoliko još uvijek ne pratite naše mačke – pozivamo vas da to učinite na:

[Facebook](#), [Web Portal](#), [Instagram](#) i [Youtube kanal](#).




Sastanak mirovnih organizacija iz regije

Udruženja “ReMi” i “Pravi Požar”, uz podršku OSCE BiH, održali su **27. Aprila** online radni sastanak sa organizacijama civilnog društva iz BiH i regije, koje su na temu izgradnje mira usaglasile zajedničke aktivnosti i akcije za naredni period.

Sve organizacije učesnice sastanka su između ostalog i aktivne na temama kao što su suočavanje sa prošlošću, mirovna edukacija, izgradnja mira, nenasilno rješavanje konflikata itd.

povezivanja i proširivanja njihovih specifičnih aktivnosti koje su komplementarne i primenljive u lokalnim zajednicama. Kao podrška sastanku, mirovni aktivisti iz Srbije i Hrvatske učestvovali su na sastanku, gdje su predstavili alate koje koriste u aktivnostima izgradnje mira u svojim zemljama.



lokalnim zajednicama kojima je potrebna podrška za sprovođenje aktivnosti na izgradnji mira.

Sam cilj sastanka bio je razmjena iskustava u oblasti izgradnje mira i predlaganje inicijativa za sprovođenje konkretnih zajedničkih aktivnosti u narednom periodu.

konferencija organizacija civilnog društva na temu izgradnje mira, gdje bi se informisala javnost ali i donosioci odluka na svim nivoima vlasti u BiH o potrebi sistemskih rješenja u oblasti izgradnje mira, te ponudili alati i modeli u oblasti mirovnog rada koji bi se primjenjivali na svim nivoima u BiH.

Učesnici sastanaka: **Lučiano Kaluža**, ReMI Mreža Derвента, **Spasoje Kulaga**, Pravipožar Derвента, **Mikele Parente**, ForumZFD Sarajevo, **Branislava Vajagić**, Centar za ratnu traumu Novi Sad, **Amer Delić**, Centar za nenasilnu akciju Sarajevo/Beograd, **Srđan Ostojić**, Perpetum Mobile, Banja Luka, ORC Tuzla, **Otto Rafai**, RAND Sesvete, **Mirna Dabić**, aktivista za prava žena i rodnu ravnopravnost, Doboj, **Edin Ramulić**, Fondacija za izgradnju kulture sjećanja, Prijedor, **Ivan Lupis**, UNDP Sarajevo, **Una Telegrafčić**, Mreža mira BiH Sarajevo, **Mladen Stojičić**, OSCE, **Mark Hanbury**, OSCE.

Sa mačkama u zajednici

Naš serijal emisije [#SamackamaUZajednici](#) se nastavlja! Drugu sezonu započinjemo predstavljanjem tima i aktivnosti **Omladinskog resursnog centra Tuzla** odnosno **CAT tima**. [VIDEO](#)



Ekipa ispred RTV7 Tuzla predstavila je mali dio onoga o čemu će biti riječi u narednim mjesecima. Prezentovane su, između ostalog, pozitivne priče mladih koji su pronašli način kako da prosperitetno ostanu u BiH.

[#CATBiH](#) u saradnji sa Radio televizijom 7 Tuzla ([#RTV7](#)) realizuje ovu emisiju, u kojoj je pažnja posvećena aktuelnim društvenim temama, gradu, ljudima, podršci mladima, prilikama za mlade, civilnom sektoru, društvenom aktivizmu i slično.

Predviđeno je da u narednom periodu ugostimo brojne goste, između ostalih akademske ličnosti, psihologe, sociologe i predstavnike mladih, a vas pozivamo da nam u komentarima napišete koje teme biste voljeli čuti u budućim izdanjima emisije "Sa mačkama u zajednici"!

Naš idući gost bio je **Agora centar Tuzla**! UG Agora je organizacija civilnog društva koja putem programa neformalne edukacije zasnovanih na principima otvorenog obrazovanja osnažuje i jača kapacitete pojedinaca, posebno mladih kao odgovornih građana koji preuzimaju odgovornost za svoj lični razvoj i razvoj zajednice. [VIDEO](#)



API KOMORA TUZLA

Ističući važnost zdravlja, brige o organizmu i očuvanju imuniteta, jednu od naših emisija posvetili smo api inhalacijama, kada smo u Gornjoj Tuzli posjetili Api komoru i razgovarali sa vlasnikom Eldarom Selimovićem.

Eldar je mlada osoba koji je pokušao nešto novo, potrudio se i uspio. O njegovom uspjehu, koji pomaže svima, govorili smo kroz zajedničko druženje. Završio je Medicinsku školu u Tuzli, a trenutno završava Stomatološki fakultet.

Pojasnio nam je, između ostalog, kako se inhalacija zrakom iz košnice koristi za liječenje mnogih, ali prije svega respiratornih oboljenja.

Na prostoru cijele BiH ima tek nekoliko api komora, a mi smo vam pripremili emisiju u kojoj se detaljnije možete upoznati sa liječenjem api inhalacijama u Tuzli i brojnim ljekovitim proizvodima koje možete potražiti, a koji mogu unaprijediti zdravlje cjelokupnog organizma. [VIDEO](#)

Počela je nova „CAT Digitalna Akademija“

Druga CAT Digitalna Akademija je započela u ponedjeljak, 19. aprila 2021!

U saradnji sa eminentnim omladinskim radnicama iz Srbije **Ivanom Volf** i **Marinelom Šumanski** donosimo našu Drugu Digitalnu akademiju za menadžere/ice društvenih mreža!

Digitalna akademija je okupila 20 najmotivisanijih mladih menadžera/ica društvenih mreža iz organizacija civilnog društva u Bosni i Hercegovini.

Na prvom modulu i online upoznavanju je sa učesnicima/ama napravljen uvod i poželjena dobrodošlica, objašnjena pozadina Akademije i CAT-a, ciljevi i očekivanja edukatorica i organizatora/ica, pojašnjeni elementi programa kao i metodologija treninga.



U sklopu predstavljanja programa Akademije najavljena je i terenska aktivnost, odnosno offline modul, koji će se održati u Bijeljini od 17. do 21. maja!

Želja nam je da potaknemo kreativno okruženje u kojem će se mladi osjećati prijatno i ohrabreno da započnu svoju kampanju u zajednici.

Nakon završenog treninga uživo polaznici/ce Akademije će biti u mogućnosti da u partnerstvu sa drugim polaznicima/cama pokrenu svoje digitalne kampanje, koje će između ostalog imati za cilj i jednu "onground" akciju u zajednici odakle dolaze.

Ova aktivnost je podržana kroz program Bosnia and Herzegovina Resilience Initiative (BHRI).

PodCat sa Malikom

Kada je i kako je u Općini Pale u FBiH nestalo 125 hiljada KM pogledajte u novoj epizodi PodCAT-a sa Malikom. Gošća nove epizode bila je mlada vijećnica u OV Pale u FBiH **Ilmana Imširović**, Ilmana je u novoj epizodi zajedno sa Malikom razgovarala o prilikama za mlade na lokalnom nivou, budžetima za mlade ali i o aktuelnim političkim pitanjima. [VIDEO](#)



Novu sezonu PodCAT-a sa Malikom CAT Bosna i Hercegovina realizuje u suradnji sa Fondacija Boris Divković.

"Ironija je da neko zaradi penziju u centru za mlade"

Ko je to i u kojem centru za mlade zaradio penziju pogledajte u novoj epizodi PodCat-a sa Malikom. Gost nove epizode bio je mladi vijećnik u OV Novo Sarajevo **Riad Idrizović**, Riad je zajedno sa Malikom razgovarao o prilikama za mlade na lokalnom nivou, centrima i budžetima za mlade te o aktuelnim političkim pitanjima. [VIDEO](#)

"Mladi Mostara se jednoglasno složili oko Sebije" o čemu je riječ pogledajte u novoj epizodi PodCAT-a sa Malikom

Gosti nove epizode bili su mladi politički aktivisti iz Mostara **Emina Ćorić** i **Marko Vračević** i mladi vijećnik iz Mostara **Goran Bošnjak**.

Mladi Mostara su u novoj epizodi zajedno sa Malikom razgovarali o budžetu za mlade Grada Mostara, prilikama ili neprilikama koje imaju mladi iz mostara ali i o aktuelnim političkim pitanjima. [VIDEO](#)

PodPatrola – Da li poznajete nekoga ko je napustio BiH u potrazi za boljim životom? Fale li vam?

Gotovo svako od nas ima nekoga ko je napustio BiH kako bi sebi obezbijedio dostojanstven život.

Kada će se naši najdraži vratiti, pitali smo naše građane? [VIDEO](#)



REDOVNE AKTIVNOSTI ORC I HCA TUZLA

Tokom aprila radili smo na održavanju i razvoju komunikacija i koordinacije unutar Omladinske mreže Bosne i Hercegovine (www.omladina-bih.net). U okviru toga smo svakodnevno na mejling listu mreže (posta@omladina-bih.net, alfbih@googlegroups.com), ali i na druge adrese u Bosni i Hercegovini i regiji distribuirali informacije interesantne za mlade i omladinski aktivizam u BiH. Vršili smo korespondenciju sa organizacijama i pojedincima zainteresovanim za rad mreže, odgovarali na upite vezane za određene aktivnosti, edukacije i ostale informacije vezane za aktivizam mladih u BiH. Isto tako, naš projektni tim nastavio je sa apliciranjima za projekte.

PLANOVI HCA/ORC-A ZA MAJ 2021.

- Nastavljamo sa aktivnostima u novom ciklusu CAT - Expanding the Media Toolbox. U okviru ovoga ćemo emitovati dokumentarni film „Efendijin zavjet“, u saradnji sa **Međureligijskim vijećem BiH**, počeli smo sa realizacijom II „Digitalne akademije“ sa mladima iz BiH, nastavili serijal „Mačke u lokalnoj zajednici u saradnji sa RTV7 Tuzla, nastaviti snimanje „PodCat-a sa Malikom, ovoga puta sa mladim vijećnicima i odbornicima širom Bosne i Hercegovine, u saradnji sa [Fondacija Boris Divković](#). Snimiti 50 emisija "CATPatrole", koje će se tokom ljeta emitovati na jednoj od televizija sa nacionalnom frekvencijom u saradnji sa [FIST Production Sarajevo](#)., Kontinuirano nastaviti sa online kampanjom (Vijesti i prilike za mlade, poruke i glasovi mladih, video, foto, meme sadržaj), Realizovati 20 pub kvizova širom Bosne i Hercegovine na temu aktivizma, izgradnje mira i povjerenja, političke i medijske pismenosti u saradnji sa našim partnerima, Proširiti CAT BiH tim sa mladima iz Omladinske grupe ORC Tuzla
- Nastavak aktivnosti u okviru ALF Mreže BiH. U okviru ovoga ćemo u maju organizovati Prvo internacionalno online piano takmičenje „**Sergei Rachmaninoff**, a u okviru **ALF Virtual Marathon for Dialogue in the EuroMed**, a tokom maja organizovati godišnji sastanak mreže, na kome će biti predstavljen izijenjeni i dopunjeni „**Sporazum o saradnji članica ALF BiH**“, te organizovati konferenciju za medije i stakeholdere na kojoj ćemo informisati javnost o urađenim aktivnostima ALF BiH u proteklom periodu i planovima za dalje, O ovome ćemo vas obavijestiti u skorije vrijeme
- Nastavak aktivnosti u okviru partnerskog projekta „Youth Rule o Law LAV (YroLL), čiji je nosilac Udruženje „Ja BiH u EU“ iz Sarajeva, a podržan je od strane Evropske unije. Projekat će trajati 30 mjeseci. O aktivnostima ćemo vas informisati na našim glasilima.
- Nastavak rada na fundraisingu.
- I, ako Bogda početak realizacije rekonstrukcije tavana iznad naših kancelarija, koji smo dobili od grada Tuzla na korištenje, te otvaranje **Centra Aktivista Tuzle**. Do sada smo uspjeli očititi i izbaciti smeće koje se decenijama nakupljalo na tavanu (otprilike 4-5 tona papira, drveta, lima, stakla i ostalog smeća, ali i pronaći dosta fotografija Tuzle i aktivnosti sportskih klubova i mladih u periodu 1960 – 1985. Od ovih fotografija planiramo napraviti izložbu u skorije vrijeme. U očekivanju urbanističke saglasnosti i građevinske dozvole, krećemo polako sa namicanjem sredstava.

Ovom prilikom pozivamo sve koji poznaju organizaciju, donatora, pojedinca ili sl. koji nam može pomoći u rekonstrukciji tavana, da nam jave. Hvala!

AKTIVNOSTI ČLANICA OMLADINSKE MREŽE BiH



Centar za mlade INPUT

Ul. Mokušnice 10, 72000 Zenica

Tel./fax: +387 61 766 532

E-mail: info@inputcentar.com

Web: www.inputcentar.com

Facebook:

<https://www.facebook.com/udruzenje.input>

Članovi Centra za mlade INPUT obilježili Dan planete Zemlje sa najmlađima sadeći drveće

22. aprila, na Dan planete Zemlje, predstavnici Centra za mlade INPUT su obilježili kroz sadnju crnogoričnog drveća sa djecom iz JU "Predškolski odgoj i obrazovanje" – vrtić „Pinokio“. Tema ovogodišnjeg Dana planete Zemlje je „Obnovimo našu Zemlju“, pa su članovi Centra za mlade INPUT htjeli doprinijeti zdravlju planete kroz sadnju drveća, te pokazati najmlađima kako da uljepšaju svoje vrtiće, pa i našu zemlju.

Također smo posjetili drugare u vrtiću Richmond Park Preschool, gdje smo zajedno zasadili drveće jasena. Željeli smo da naši najmlađi zasade drveće i cvijeće i nauče kako da njeguju i čuvaju okolinu.



Centar za mlade INPUT obilježio Međunarodni dan djevojaka u IKT – Girls in ICT Day 2021

Centar za mlade INPUT se i ove godine pridružio obilježavanju globalne inicijative “Girls in ICT Day”, s ciljem da dodatno podstakne razvoj i učešće u STEM obrazovanju svih učenika, a naročito djevojčica.

“Girls in ICT Day” se tradicionalno obilježava posljednjeg četvrtka u mjesecu aprilu, nizom prigodnih događaja širom svijeta, a kojim se pozivaju djevojke da se usude i projektuju svoju budućnost kao kreatori IKT sektora.


Pridružujući se ovoj globalnoj inicijativi i promovišući IKT (informaciono-komunikacione tehnologije) i STEM obrazovanje (obrazovanje u oblasti nauke, tehnologije, inženjerstva i matematike), Centar za mlade INPUT je organizovao online događaj sa par radionica pod nazivom – „ICT future for girls“

Djevojke su putem online platforme Zoom imale mogućnost da prate dvije radionice i to jednu iz oblasti Upoznavanje s osnovama programskog jezika Java u NetBeans IDE razvojnom okruženju i drugu Upoznavanje s osnovama rada u programu Inkscape koji se koristi za obradu slika i videa, kao i Webinar na temu Budućnost djevojaka u IKT gdje ćemo ugostiti djevojke i žene iz IKT oblasti.

Na pomenutom događaju učešće je uzelo oko 70 djevojaka koje su imale priliku da nauče nešto novo i da se još bolje upoznaju sa IKT. Online radionice su vodile studentice softverskog inženjerstva treće godine, koje su članice, kao i praktikantice u Centru za mlade INPUT. Prisutne djevojke su iskazale veliko oduševljenje i želju za daljim učenjem iz oblasti IKT i STEM-a, a ujedno su se i zahvalile Centru za mlade INPUT koji već par godina organizuje i obilježava Međunarodni dan djevojaka u IKT sa cilje da se priključi i zainteresuje što veći broj djevojaka.

Povodom Dana planete zemlje – „Eko izazov – 100 timova, jedna misija“

Povodom obilježavanja Dana planete Zemlje, tim projekta „Eko izazov- Učinimo svoju zemlju još ljepšom“ u saradnji sa Američkom ambasadom u BiH i Američkom trgovinskom komorom AmCham odlučio je nagraditi vrijedne timove širom naše zemlje sadnicama koje su zasađene na površinama koje uređuju. Ova akcija sadnje drveća pod nazivom „100 timova, jedna misija“ provodi se na 100 lokacija širom Bosne i Hercegovine, a aktivnost sadnje u Gradu Zenici proveo je Centar za mlade INPUT. Članovi



Centra za mlade INPUT su zasadili sadnicu graba na lokaciji koja je bila zapuštena, koju su prije toga uredili.

Projekat „Eko izazov- Učinimo svoju zemlju još ljepšom“ pokrenut je 2020. godine sa ciljem obilježavanja 25 godina mira u BiH, te povećanje ekološke svijesti kroz realizaciju aktivnosti čišćenja, uređenja zemljišta i sadnje drveća u lokalnim zajednicama.

Članovi i volonteri **Centra za mlade INPUT** koji djeluje već punih 13. godina radi na očuvanju životne sredine i prirode, te su članovi i volonteri imali motiv da inspirišu i druge mlade ljude da se priključe aktivnostima očuvanja prirode, a tako i Eko izazovu i timu i akciji „100 timova, jedna misija“



**OMLADINSKA ORGANIZACIJA "SVITAC"**

Ul. Jusufa Čampare bb, 76100 Brčko Distrikt BiH

Tel./Fax: +387 49 211 032

E-mail: svitac@gmail.netWeb: www.svitac.orgFB: www.facebook.com/omladinska.svitac

Dnevne radionice

Omladinska organizacija Svitac je nastavila sa svakodnevnim interaktivnim i online aktivnostima. Mlađi učesnici su radili kreativne i edukativne stvari prilagođene uzrastu, uz pomoć lokalnih i međunarodnih volontera. Ovaj mjesec su radili: emotikone od balona, vate i drvenih štapića, bubamare od šarenog papira, safari životinje od plastelina i bojanje cvijeća metodom otiska prstiju. Gledali su video projekcije priča i bajki, te crtane filmove sa porukama o prijateljstvu, proljeću, empatiji i ljubavi prema porodici (Pixar i CGI animacije). Završili su sa azbukom, te nastavili učiti brojeve od 1-10 uz pomoć zanimljivih radnih listova. Na muzičkim radionicama su radili pjesmu „Let, let bubamaro“. Učili su tekst i pripremali se za snimanje videa na kraju mjeseca. Na radionicama engleskog jezika su učili pridjeve za opisivanje emocija (ljut, zbunjen, sretan, tužan), nazive životinja koje možemo upoznati na safariju i životinja koje žive u Aziji i čime se hrane. Kao i prethodnih mjeseci Svitac je u okviru redovnih aktivnosti intenzivno radio na temi higijena i posvetio joj posebnu pažnju. Cilj ovih aktivnosti kao i do sada je da djeca razviju maštu i da koristeći razne materijale izraze svoju kreativnost, te da razviju motoriku, osjećaj tolerancije i poštovanje prema drugima i usvoje lijepo ponašanje.



Uzrast 13+ je učestvovao u radionicama na teme: emocionalna stabilnost (kako prevladati tugu ili podijeliti radost), važnost čitanja i održavanja dobrih navika, žene kao uzori u našem životu i rasizam u BiH. Na ovaj način želimo mladima pružiti siguran i neutralan prostor, u kojem mogu reći svoje mišljenje.

Na engleskim i njemačkim radionicama smo posvetili pažnju gramatici - pridjevima i glagolima kako bi napisali recept za omiljeno jelo, opisali članove obitelji, prijatelje i njihove karakterne osobine. Pored toga smo vježbali svakodnevnu komunikaciju i radili na projektima i prezentacijama za školu.

Koordinator radionica je bio Adin Midžić uz asistenciju lokalnih i EVS/ESC međunarodnih volontera.

Radionice gitare

Učesnici su radili na usvajanju i uvježbavanju novih tehnika. Pored toga su usavršavali pjesme, etide i kompozicije iz prethodnog perioda kao što su: "Mary had a little lamb", "Kiša pada, trava raste",

“Francuska dječija pjesma”, “I remember you”, “Killing me softly”, Etide br.7,8,9,10,11 iz “20 pisama” (R. Dyens). U sklop novih pjesama, etide i kompozicija spadaju: “Večernji zvon”, “Etida u E-molu” (F. Sor), Etide br.12,13,14,15 i 16 iz “20 pisama” (R. Dyens), “Tempera” (Gibboni).

Radionice sambe

Učesnici su nastavili rad bez korištenja električne i bas gitare, tako da je fokus bio na ritmičkim frazama i motivima nastalim u toku improvizacije na instrumentima, a koji su kasnije sklapani u veću cjelinu tj. kompoziciju.

Dan planete Zemlje

Svitac je 22. aprila obilježio Dan planete Zemlje kroz dvije interaktivne radionice za učesnike uzrasta 4-7 i 16+. S našim malim prijateljima i pomagačima smo na kreativan način obilježili ovaj dan. Učesnici su nacrtali oblik ruku, iskružili ih makazama, te su u sredinu zalijepili planetu. Cilj je bio učiniti planetu sigurnom u dječjim rukama. Radionica je implementirana edukativnom i vizuelnom metodom sa slikama i videom.

Sa našim učesnicima 16+ smo razgovarali o ekologiji, te napravili poster sa motivacionim i pozitivnim porukama. Cilj radionice je podizanje svijesti o zaštiti okoliša i razvijanje razgovora na engleskom jeziku, te osjećaja za kreativnost.



Sve aktivnosti su implementirane u prostorijama Omladinskog centra Brčko distrikt.

Za maj se planira nastavak svih aktivnosti Omladinske organizacije Svitac.

**Fondacija tuzlanske zajednice**

Pozorišna 13, 75000 Tuzla BiH

Telefon: +387 35 362 830

Faks: +387 35 362 831

fondtz@fondacijatz.org

„Bike boom“: Lov na kilometre u brdima Tuzlanskog kantona

Godinama unazad biciklisti su stidljivo počeli zalaziti u brda i istraživati mnoštvo terena u Tuzlanskom kantonu pogodnih za brdski biciklizam. Pandemija je intenzivirala ovaj trend, pa mladi sve više druženje i zabavu, njegujući zdrav način života, traže u brdima i planinama. S ciljem zaštite okoliša i promocije zdravog načina življenja Fondacija tuzlanske zajednice u prošloj godini podržala je brojne projekte građana među kojima su i tri projekta mladih koji se tiču biciklizma, a njihova realizacija počinje upravo sada, dolaskom proljeća.

Mladi spas od pandemije traže u brdima

Predsjednik biciklističkog kluba “MTB Trebava” Osman Nurkić kaže da mu je za nezaboravne avanture potreban samo bicikl i dobro društvo. Ovaj klub trenutno radi na mapiranju dijela dionice tzv. “Rimskog” puta na području Gračanice, koji je u prošlosti spajao rijeku Spreču sa Savom, preko planine Trebave. Pored toga što žele oživjeti historijski značajan dio ove trase, povezati dva izletišta na trebavi (Bijela Voda i Vis), ovi mladi entuzijasti žele svim građanima pružiti priliku da na siguran način uživaju u prirodnim ljepotama koje ih okružuju:

Sigurnost potpomognuta digitalizacijom ruta

“Iako su minska polja na Trebavi jasno označena, postoji određen strah kod ljudi. Ono što mi želimo pružiti svima, ne samo biciklistima, nego i planinarima i porodicama, je to da na siguran način asfalt zamijene čistim zrakom. Radimo na mapiranju puta i kreiranju aplikacije koja će svima biti na raspolaganju. Sada ćemo ubrzano raditi na postavljanju klupa i putokaza, kako bi svi što prije mogli uživati u sigurnom okruženju, daleko od vreve grada.”

Žive dječake snove vozeći bicikle

Kao dječak je uvijek maštao da sa prijateljima pokušava savladati nove staze, ali tada niti je imao adekvatan bicikl, niti su postojale staze. Upravo to je ono što ovi entuzijasti žele promijeniti i omogućiti novim generacijama. Nadaju se da će njihove aktivnosti biti samo početak povezivanja sa sličnim udruženjima, kako bi gradovi u TK u bližoj budućnosti bili povezani brdskim rutama. Osim toga, neka od izletišta koja trenutno žele povezati su potencijalno zanimljive turističke destinacije, pa se nadaju i saradnji sa lokalnom vlašću i turističkom zajednicom, s kojima su već inicirali komunikaciju. Sama ideja za osnivanjem kluba javila se kao potreba i želja za druženjem na siguran način tokom pandemije. Iako je ushićenje zbog istraživanja novih terena neopisivo, Osman



naglašava da se u ovakve avanture ide isključivo u grupama i sa iskusnim biciklistima, te da su svi oni koji se žele okušati u brdskom biciklizmu dobrodošli.

Bicikli sve popularniji kao alternativna vrsta prevoza

U Biciklističkom klubu Živinice nisu obeshrabreni time što nisu otvorili sezonu kako su planirali. Ne gube nadu, jer Živinice postaju pravi “bike-friendly” grad. Čim uslovi to budu dozvoljavali na vožnju u povodu otvaranja sezone pozvaće sve sugrađane, dok će za najmlađe organizovati takmičenje u vožnji bicikla na gradskom Bulevaru. Nadaju se da će ovaj projekat, koji će realizovati uz podršku Fondacije tuzlanske zajednice dodatno motivirati ljude da koriste češće bicikl kao prevozno sredstvo jer tako smanjuju i emisiju gasova u atmosferu. Od početka pandemije broj članova u klubu se udvostručio, tako da sada



svoje slobodno vrijeme skoro stotinu mladih provodi istražujući zaštićeni pejzaž Konjuha na biciklima. Aktivno rade na obilježavanju staza i u Komoot aplikaciju unijeli su preko 50 mapiranih kilometara dionica, što je svakome dostupno.

Pitome planine u TK idealne za spoj planinarenja i brdskog biciklima

Enes Herceg iz Udruženja MTB Gradina Srebrenik bicikl godinama unazad koristi i kao prevozno sredstvo i kao omiljeno sredstvo za zabavu. Objasnjava kako će ova grupa mladih ljudi već u narednim danima početi radove na uređenju zapuštene planinarske staze na Majevidi, na relaciji Lipici – Gornji Hrgovi, tako što će postaviti putokaze, s obzirom na to da se dešavalo da ljudi zalutaju zbog nepoznavanja terena. Iako se uvijek odazivaju na akcije i u ključuju u potrage za izgubljenim mještanima i posjetiocima, smatraju da je Majevidica pitoma planina, sa dosta ravnog terena, što je čini pristupačnom i za početnike. “Mladima je pandemija uskratila skoro sve načine za druženja, pa su zabavu i rekreaciju potražili u brdima. I ne samo mladi, nego skoro sve generacije! Nas to jako raduje i već prilikom prvih vožnji učimo ih kako se orijentisati u prirodi, kako se ponašati ukoliko se izgube, ukazujemo na značaj nošenja zaštitne opreme i one koji se toga ne žele pridržavati ne primamo u Udruženje. Sigurnost je na prvom mjestu”, objasnjava Muhamed Morankić, iskusniji i stariji član u ovom Udruženju, te ističe kako im je želja da se u grupne vožnje uključuju cijele porodice.

Iako je epidemiološka situacija još uvijek vrlo nepovoljna, ovi inovativni mladi ljudi pronašli su način da uživaju u onome što vole na siguran i bezbjedan način, pri tome stvarajući uslove za sve one koji žele krenuti njihovim tragom. Ove inicijative podržane od strane Fondacije tuzlanske zajednice samo su jedan od pokazatalja potencijala Tuzlanskog kantona i kako građani svojim primjerom mogu doprinijeti stvaranju boljih uslova življenja. Novi javni poziv za podršku projektima mladih otvoren je do 18. aprila. Saznaj više na: https://www.fondacijatz.org/page/39/1097#Apliciraj_na_fond

Omladinska Banka

Radujemo se novim idejama mladih

Članovi odbora Omladinske banke tokom proteklog mjeseca prošli su trening “Kako odlučivati u Omladinskoj banci”. Preko 80 mladih ljudi, većinom srednjoškolaca, podijeljenih u 5 skupina u skladu sa epidemiološkim preporukama, u trening kući Labirint naučili su kako na demokratski način odlučivati o podršci projektima s kojima na javne pozive Fondacije tuzlanske zajednice apliciraju udruženja mladih.

Ovo je jedna od prvih ali i najvažnijih edukacija za mlade članove i članice odbora koji su ove godine odlučili dati svoj volonterski doprinos razvoju zajednice i omladinskog sektora u Tuzlanskom kantonu. Mladi uče o demokratskom i transparentnom donošenju odluka kako bi mogli odgovorno upravljati sredstvima namijenjenim za podršku inicijativama svojih vršnjaka. Velika je to odgovornost za mlade ljude ali i prilika za iskustveno učenje jer u Omladinskoj banci sve je koncipirano na modelu "mladi za mlade".



Mladi za mlade

Treninge su po prvi puta, uz pomoć iskusnijih koordinatora, održali novi koordinatori odbora OB-a: Gloria Brkić, Elma Gazetić i Emir Sprečak, koji su prije i sami bili članovi odbora Omladinske banke. Uz podršku koordinatora Marka Divkovića i Jasmine Paočić, kreirali su jake timove koji će u narednom periodu biti pokretači pozitivnih promjena u svojoj zajednici.

Gloria Brkić, osamnaestogodišnja učenica srednje Medicinske škole u Tuzli prošle je godine bila članica odbora. To iskustvo joj je olakšalo rad na poziciji koordinatorice jer poznaje potrebe članova odbora. Još je tada željela postati osoba koja će prenositi znanje i raditi s mladima: "Mladi na treningu uče kako da na objektivna način odlučuju o projektima mladih i kako da prepoznaju da li je neki projekat dobar za zajednicu. Pored toga imat će odgovornost da sami nadgledaju realizaciju projekata koje podrže. Nije lako doći u nepoznat ambijent gdje ne znate nikoga, tako da sam sretna da smo se već na prvom treningu riješili treme."

Elma Gazetić se super osjećala u ulozi koordinatorice i kaže da nikad nema tremu jer uvijek radi opušteno. Fino se uklopila sa članovima odbora i vrlo je zadovoljna treningom i prilikom da ga vodi.

"Članovi odbora naučili su da donose odluke objektivno, gledajući na to da su projekti iz prioritarnih oblasti poziva, da poštuju druge i drugačije, te da svi u odboru imaju pravo da odlučuju. Mene zadivljuje ovakav način rada i pristupa ljudima. Pandemija nas je otuđila, ali Omladinska banka je meni tu otuđenost olakšala, jer mi je pružila mogućnost da se družim sa vršnjacima na siguran način. Možda zvuči čudno, ali za mene su ovo zahvaljujući OB-u divne godine", priča ova sedamnaestogodišnja učenica srednje Medicinske škole u Tuzli.

Očekuju odlične rezultate

Odbor Omladinske banke u Tuzli je, u odnosu na odbore u Živinicama, Lukavcu, Kalesiji i Srebreniku najaktivniji, tako da je rad u ovim odborima nešto izazovniji, jer treba uložiti dodatan napor da se mladi ljudi aktiviraju. U odboru Srebrenik ima najmanje članova, ali za koordinatora ovog odbora, Emira Sprečaka, to je dodatni motivirajući faktor u radu i svaki uspjeh dodatno ga ohrabruje: "Svakodnevno se čujem sa članovima svog odbora i već imamo prijateljski odnos. Smijeh i šale su neizostavni dio OB-a, ali jako ozbiljno shvatamo rad, tako da se svi maksimalno zalažemo. Sreća se može naći u svemu, treba je samo znati izdvojiti. Kao dijete koje dolazi iz pasivne zajednice, puno mi znači što danas imam zadatak da motiviram druge na akciju. Jako puno sam se pripremao za trening, po prirodi sam optimista, tako da vjerujem da će ono što zajedno započnemo ove godine dati odlične rezultate."

Novi koordinatori i članovi odbora OB-a vrijedno su se pripremali i organizovali kako bi u narednom periodu timski i odgovorno mogli razmatrati kojim projektima mladih će dati podršku. Javni poziv za projekte mladih otvoren je do 18. aprila. OB-ovci se nadaju inovativnim i uzbudljivim aplikacijama koje će zajednički s drugim mladim ljudima sprovesti u djelo u narednim mjesecima. Više o pozivu na linku: <https://www.fondacijatz.org/page/39/1097>



Udruženje građana "C.E.Z.A.R." Srbac

Zdravka Čelara 29, 78420 Srbac

Tel: 051 928 126

e-mail: zdravosrbac@yahoo.com

Dan planete Zemlje



Povodom Dana planete Zemlje UG „C.E.Z.A.R.“ je objavio konkurs za izbor najbolje fotografije i literarnog rada za djecu i mlade iz Srpca, Travnika i Sarajeva (organizacije: UG „C.E.Z.A.R.“, Centar za edukaciju mladih CEM, Vijeće mladih općine Stari Grad Sarajevo“). Tema foto-konkursa je „Bosna i Hercegovina kroz eko objektiv“, a tema likovnog konkursa je „Naša planeta Zemlja“. Konkurs je otvoren do 15. maja. Autor najbolje fotografije dobija plaketu i poklon iznenađenja, dok će najbolji literarni radovi biti odštampani na promotivni

materijal. Konkursi se realizuju u sklopu projekta „Youth Corners of Trust and Peace“, koji finansira Američka ambasada u BiH.

Video sa porukama mladih ljudi iz Srpca, Travnika i Sarajeva (organizacije: UG „C.E.Z.A.R.“, Centar za edukaciju mladih CEM, Vijeće mladih općine Stari Grad Sarajevo“) je nastao u sklopu projekta „Youth Corners of Trust and Peace“, koji je finansijski podržala Američka ambasada u BiH, a imao je za cilj da ukaže na značaj odgovornog ponašanja prema planeti Zemlji, kako pojedinca, tako i cijelog ljudskog roda.

Još jedan način obilježavanja Dana planete bila je akcija sadnje drvoreda japanske trešnje na Bardači, u dvorištu Trening centra Prirodnog matematičkog fakulteta u Banjoj Luci. Akcija je održana istovremeno na nekoliko lokacija širom BiH, a realizovana je u okviru Zelene mreže BiH, novoformirane mreže mladih aktivista za zaštitu životne sredine, koju podržava Ambasada Italije u Bosni i Hercegovini. Događaju su prisustvovali predstavnici Ambasade Italije, NGO ERRDO, PMF-a iz Banja Luke, štićenici Doma za starija lica Bardača, kao i partnerske organizacije Cerebra iz Banja Luke i Centar za djecu, mlade i porodicu iz Laktaša.



Usvojena Bardača Inicijativa

Ekološka inicijativa mladih (Bardača inicijativa) usvojena je na Bardači od strane učesnika prve ekološke konferencije mladih e.Kon 2021.

Ovom inicijativom želi se osigurati veće učešće mladih u zaštiti životne sredine i u donošenju odluka u oblasti ekologije. Inicijativom je preuzeta obaveza da se izradi PRVA Omladinska Ekološka Deklaracija koja će biti usvojena u aprilu 2022. Godine na Dan planete Zemlje.

Konferenciju su organizovali CERD putem Eko HUB-a Laktaši i u saradnji sa omladinskim organizacijama koje djeluju na našem području (Cerebra NGO,

SaMSIC, Studentska organizacija Prirodno – matematičkog fakulteta, Centar za djecu, mlade i porodicu Laktaši i UG „C.E.Z.A.R“ Srbac, koji je ujedno bio domaćin konferencije).

Ovom prilikom na Konferenciji je pokrenuta i veoma važna lokalna inicijativa pod nazivom “VRATIMO VODU U BARDAČU”. Cilj ove inicijative je saniranje ogromne devastacije ovog zaštićenog močvarnog područja koje se izvršilo kroz uništavanja vodenih resursa i života na ovom prirodnom staništu.

Zaposli srednjoškolca

Održan je Završni događaj u sklopu projekta „Zaposli srednjoškolca“. Događaju su prisustvovali srednjoškolci koji su u proteklih mjesec dana bili zaposleni u neke od firmi/ustanova u Srpcu, ali i poslodavci koji su dali šansu ovim mladim ljudima da steknu prvo radno iskustvo. Ovo je bila prilika da se srednjoškolicima uruče Sertifikati, a poslodavcima Zahvalnice za učešće u projektu. Poslodavci koji su dodatno finansijski nagradili i podržali mlade, dobili su Plakete. Takođe, prikazan je promotivni film koji je pokazao kako su se srednjoškolci snažili na radnim mjestima i suočili sa radnim zadacima, a izradili su ga takođe srednjoškolci koji su svoje radno mjesto pronašli u UG „C.E.Z.A.R.“.

Projekat „Zaposli srednjoškolca“ je imao za cilj da srednjoškolci steknu praktična znanja i vještine kroz prvo radno iskustvo, za šta su dobili honorar. Projekat je realizovan uz podršku Ministarstva porodice, omladine i sporta Republike Srpske.



Institut za
razvoj mladih KULT



Ul. 4. Viteške brigade

34 – 36 BA, 71210 Ilidža, Sarajevo

Tel: +387 33 778 778.

Fax: +387 33 778 79

E-mail: kult@mladi.org, web:
www.mladi.org

Ured za borbu protiv korupcije i upravljanje kvalitetom i Institut za razvoj mladih KULT potpisali sporazum o saradnji

Ured za borbu protiv korupcije i upravljanje kvalitetom Kantona Sarajevo i Institut za razvoj mladih KULT potpisali su sporazum o saradnji u cilju strateškog pristupa borbi protiv korupcije kod mladih u Bosni i Hercegovini. Istraživanja o položaju i potrebama mladih, koja Institut redovno provodi u različitim lokalnim zajednicama u BiH, korupciju izdvaja kao jedan od značajnijih faktora zbog kojeg mladi napuštaju BiH.



Sporazumom je definirano da će potpisnice u budućnosti zajednički raditi na unaprjeđenju neformalnog obrazovanja o borbi protiv korupcije za mlade, informiranju mladih o mogućnostima i načinu anonimne prijave koruptivnih radnji, izradi strateških dokumenata u oblasti borbe protiv korupcije, provođenju istraživanja i analiza o percepciji korupcije kod mladih, te na drugim informativnim i edukativnim događajima na temu borbe protiv korupcije sa posebnim naglaskom na mlade.

Iz Ureda je saopćeno da je Institut za razvoj mladih KULT prva nevladina organizacija s kojom Ured potpisuje sporazum o saradnji.

Ured i Institut će izvještavati javnost o preduzetim aktivnostima. Korupciju je moguće prijaviti i putem emaila: prijavikorupciju@uk.ks.gov.ba.

Za podršku inicijativama mladih izdvojeno oko 330.000 KM

Institut za razvoj mladih KULT u protekle dvije godine u okviru programa "Jačanje vještine i poticanje liderstva kod mladih" izdvojio je oko 330.000 KM. U tom periodu podržano je 29 inicijativa mladih u 17 zajednica širom Bosne i Hercegovine.

Inicijative su usmjerene na razvoj sektora, provođenje postojećih legislativa za mlade, učešće i uključivanje mladih, aktivizam te jačanje kapaciteta organizacija. Kontinuirana finansijska i mentorska podrška organizacijama civilnog društva koje rade sa mladima ojačat će sektor rada s mladima i dati im potrebnu podršku za zagovaračke inicijative za zastupanje interesa mladih.

Jedna od inicijativa je "I kopija vrijedi" koju provodi Asocijacija srednjoškolaca u Bosni i Hercegovini. Oni u okviru svoje inicijative zagovaraju promjenu upisne politike u Republici Srpskoj koja srednjoškolce završnih razreda ograničava na apliciranje na samo jedan fakultet jer prilikom upisa moraju predati

originalne dokumente. Rješenje koje je Asocijacija ponudila i koje zagovara jeste promjena članova u zakonima o visokoškolskom obrazovanju koji ograničavaju srednjoškolce na jedan izbor. Pored toga, finalizirana je publikacija "Analiza stavova srednjoškolaca o mogućnosti apliciranja na studije sa ovjerenom kopijom dokumenata" kojom će se kreirati argumentacijska platforma za zagovaranje inicijative u Republici Srpskoj.

Asocijacija u saradnji s drugim partnerima u prethodnim godinama uspješno je provela ovu inicijativu na gotovo svim javnim univerzitetima u Federaciji BiH.



Najveći broj inicijativa podržan je kroz Urgentni fond. Institut povremeno raspolaže Urgentnim fondom za organizacije civilnog društva. Cilj ovog fonda je unapređenje položaja mladih i omladinskog sektora u Bosni i Hercegovini. Kroz fond aplikanti na vrlo jednostavan način mogu podržati postojeće ili kreirati potpuno nove programe i aktivnosti za bolji položaj mladih u Bosni i Hercegovini.

Za razliku od Asocijacije, mladi okupljeni oko Udruženja građana 'Korijeni' Ugljevik zajedno sa svojim prijateljima i partnerima iz Udruženja mladih općine Sapna 'Korak' proveli su inicijativu "Zajedno za Majevicu". Udruženim snagama educirali su mlade iz ovih zajednica, ali i ostavili trajni trag uređenjem i opremanjem turističkim etno mobilijarom prostor za odmor i razonodu pored jezera Mezgraja na području općine Ugljevik i prostora za odmor i razonodu pored jezera Sniježnica na području općine Sapna. Zajedničkim radom na uređenju navedenih lokacija, mladi su pokazali da su spremni zajedno graditi budućnost BiH saradnjom, dijalogom, radom i aktivizmom.

Podršku Institutu u ovom periodu pružila je Ambasada Švedske u BiH, a Institut će nastaviti i u narednom periodu u skladu sa resursima kojima bude raspolagao podržavati mlade i unaprjeđivati položaj mladih u Bosni i Hercegovini.

Institut radi na istraživanju potreba i problema mladih u BiH

Bosna i Hercegovina nema podatke o stanju, položaju, problemima i potrebama mladih. Na razini države nema niti jedan strateški dokument koji se bavi pitanjima mladih. Postojeća zvanična tijela koja se bave pitanjima mladih u BiH na razini države nisu u potpunosti funkcionalna. Institut za razvoj mladih KULT je u 2019. godini započeo pripremu i provođenje istraživanja o položaju i potrebama mladih u cijeloj BiH. Od tada do danas pripremljena je metodologija te je održano nekoliko sastanaka sa Ministarstvom

civilnih poslova BiH kako bi bili upoznati sa idejom i procesom istraživanja.

Istovremeno Institut priprema i desk istraživanje o pitanjima mladih u Federaciji BiH, Republici Srpskoj i Brčko Distriktu BiH. Iako je pandemija Covid-19 imala veliki utjecaj na terensko istraživanje Institut intenzivno radi na terenu u svim dijelovima BiH u suradnji sa organizacijama civilnog društva. Anketari razgovaraju sa mladima u dobi od 15 do 30 godina i prikupljaju informacija i njihova razmišljanja u polju zdravlja, obrazovanja, socijalne skrbi, zapošljavanja, učešća mladih, sporta, kulture, slobodnog vremena i sigurnosti mladih. Sva anketiranja rade se putem direktnog upitnika kroz koji mladi imaju priliku dati odgovor na oko 200 pitanja. Istraživanje će imati poseban aspekt vezan za Covid-19, a rezultati će obrađivati period tokom 2019. i 2020. godine.



U istraživanje je uključeno više od 30 anketara iz svih dijelova Bosne i Hercegovine, a do sada je prikupljeno više od 1.100 odgovora. Prije analize istraživanja planirano je prikupiti oko 3.500 odgovora mladih. Na ovaj način dobit ćemo sveobuhvatnu sliku kako mladi žive i djeluju u BiH, što nam je od velike važnosti kako bismo mogli kreirati adekvatne programe u skladu sa potrebama i očekivanjima mladih.



Omladinski klub "DIJAMANT"



Ul. Bučići 42, 70101 Jajce
Tel./fax: +387 30 279 444, +387 61 179 209, +387 63 366 811
E-mail: m.sekib@bih.net.ba
WEB: www.ocd-dijamant.net, www.dijamantmoda.com

Dan planete Zemlje

Omladinski klub "Dijamant" i Ženski odbojkaški klub "Jajce-Nansen" nastavili su kontinuitet zajedničkih eko aktivnosti.

22.04. se širom svijeta obilježava Dan planete Zemlje. Međunarodni Dan planeta Zemlje, obilježava se u više od 150 zemalja s ciljem da svjetska populacija postane svjesna svoje odgovornosti prema planetu na kojem živi.

U povodu obilježavanja ovog značajnog datuma, OK "Dijamant" i ŽOK "Jajce-Nansen" nastavili smo zajednički kontinuitet eko aktivnosti u našoj zajednici.

Naime, mi smo simbolično zasadili sadnicu "srebrna smrča" u gradskom parku Jajce, i time dali svoj doprinos očuvanju naše planete. Ovu aktivnost i sadnicu povjerila nam je ambasada Sjedinjenih Američkih Država i Američka trgovačka komora u BiH (AmCham). Učešće u akciji su uzele 22 volonterke.



INFORMACIJE / DONATORI / POZIVI

Saopštenje Mreže za izgradnju mira BiH



mreža za
izgradnju mira

Vratite povjerenje građana!

Hitna nabavka vakcine protiv COVID-a treba biti prioritet
svakog predstavnika vlasti u BiH

Mreža za izgradnju Mira u BiH upućuje apel svim izabranim nosiocima državnih, entitetskih i kantonalnih vlasti da preuzmu odgovornost koju su dobili od građana demokratskim putem, te izvrše svoju dužnost, i da svojim odgovornim djelovanjem vrata građanima izgubljeno povjerenje da su sposobni da učinkovito i koherentno vode borbu protiv COVID-a.

Potrebna je hitna nabavka vakcina, bez dana odlaganja, za svakog građanina/ku Bosne i Hercegovine, bez ikakve politizacije, diskriminacije i privilegija.

Svi građani, iako prestrašeni i ogorčeni, i dalje će se boriti protiv COVID-a poštivajući sve mjere sigurnosti. Ali na vladajućim autoritetima i na zdravstvenim institucijama je mandat, dužnost i odgovornost da prestanu sa političkom propagandom i neistinama, odustanu od retorika podjela, da se ujedine i koherentno počnu djelovati kako bi osigurali sve potrebne uslove i okolnosti u svrhu zaštite zdravlja građana, njihovih života i kontrole širenja COVID-a.

Izražavamo našu podršku i neizmjernu zahvalnost svim zdravstvenim radnicima i pozivamo građane da ne odustaju od svog jasnog i glasnog konstruktivnog otpora. U ovoj teškoj individualnoj i socijalnoj krizi svi građani mogu i dalje računati na neumornu podršku Mreže za izgradnju mira za nastavak civilne borbe za društvenu odgovornost, humanost i dostojanstvo, a posebno tokom pandemije COVID virusa, sve dok zadnja potrebna vakcina ne stigne u BiH, a i dalje u budućnosti.

Mreža za izgradnju mira aktivno prati stanje u zemlji, te će nastaviti da analizira borbu protiv COVID-a i rad svih vlada na nabavci vakcine u BiH. Tim povodom Mreža uskoro će organizirati veliku konferenciju koja će okupiti lidere civilnog društva, ne samo iz nevladinih udruženja nego i medija i sindikata.

Mreža za izgradnju mira je uspostavljena u februaru/veljači 2010. godine i trenutno okuplja 217 organizacija i škola iz cijele BiH.

Što želimo i što je potrebno za cijelu državu je sveobuhvatan napor usmjeren ka obnovi kvalitete društvenog i ekonomskog života u BiH, kao i ka dugoročnom povećanju sposobnosti cijelog bh. društva da se ophodi s različitostima i sukobima na konstruktivan i nenasilan način, te time stvoriti okvir za zajedničko, koordinirano djelovanje niza nevladinih organizacija, lokalne uprave i samouprave, poslovnog sektora, medija i državnih institucija. Naš cilj u radu je uticaj i konkretne inicijative vezane uz sljedeća područja javnih politika koje su prepoznate kao ključne za dugoročnu izgradnju mira u BiH

www.mreza-mira.net

Javni poziv – VOLIM SVOJ GRAD BiH

Poštovani,

Fondacija tuzlanske zajednice, u partnerstvu sa USAID-om, u okviru programa "Snaga lokalnog", poziva građane, udruženja i institucije s područja TK da predlože projekte koji će omogućiti građanima da se uključe u aktivnosti u zajednici i poboljšaju uslove života u svojim zajednicama

Podrška se ostvaruje kroz projekat "Naša zajednica je naša odgovornost" koji ima za cilj ojačati lokalne organizacije i lokalne inicijative koje zblžavaju građane i potiču ih na samoorganiziranje, sudjelovanje i uključivanje u rješavanje specifičnih problema u njihovim lokalnim zajednicama, naseljima, gradovima i cijeloj zemlji

Rok za prijavu je 16. maj 2021.

Više informacija i aplikaciju možete pronaći na:

<https://www.fondacijatz.org/page/39/1096>

Ukoliko ste zainteresovani da aplicirate na naš poziv za podršku pozivmo vas na online konsultacije, koje će se održavati za vrijeme trajanja poziva **svakog utorka od 11.00 do 12.00h**. Sve što vas interesuje o pozivu, uslovima podrške i načinu apliciranja moći ćete saznati od naših kolega.

BCSDN Objavljuje poziv za podnošenje prijedloga za ad-hoc grnatoe za podršku



CALL FOR PROPOSALS

for Ad-hoc Support Grants

Deadline: 30 June 2021

Apply on: regionalhub@balkancsd.net

Projekti treba da doprinesu jačanju regionalne saradnje za promociju građanskog prostora u regionu Zapadnog Balkana.

Prihvatljivi kandidati mogu biti sve vrste pojedinačnih OCD i / ili mreže OCD, platforme, udruženja, fondacije, pod uslovom da su nevladine i nisu profitne i da su registrovane u najmanje jednoj od zemalja regiona Zapadnog Balkana. – Albanija, Bosna i Hercegovina,

Kosovo, Crna Gora, Srbija i Republika Severna Makedonija.

Poziv je otvoren dok ima sredstava ali najkasnije **do 30. juna 2021.**

balkancsd.net

Poziv za prijavljivanje na Ultimate Survival Leadership Camp



Poziv za prijavljivanje na Ultimate Survival Leadership Camp sada je i zvanično otvoren!

Ako ste aktivni/e u svojim zajednicama i nemate više od 35 godina, pozivamo vas da iskoristite ovu jedinstvenu priliku i do 25. maja se javite Helsinškom parlamentu građana Banjaluka i na vrijeme obezbijedite svoje mjesto u kampu.

Ultimate Survival Leadership Camp (USLC) će se organizovati u Centru za posjetioce Pecka i trajaće osam dana, od 14. do 21. juna 2021. godine. Namijenjen je mladim aktivistima i aktiviskinjama iz BiH koji će, kroz tri modula, imati priliku da obogate svoja znanja i vještine za dalji rad na polju aktivizma. Neke od tema o kojima će se učiti i diskutovati na kampu su: trenutni položaj mladih u BiH i mogućnosti za aktivističko djelovanje, nacionalizam, populizam, rod, klasa, eko-aktivizam, umjetnost kao alat za društvenu promjenu, (ne)moć društvenih mreža, itd.

Kroz razmjenu iskustava i izlaganja predvača/ica i trenera/ica iz BiH, Amerike i Kanade, radiće se na ličnom, profesionalno i političkom razvoju, umrežavanju i trasiranju akcija za društvene promjene. Pored toga, u program kampa integrisali smo i niz drugih aktivnosti kao što su izleti na rijeku Sanu, kuvanje, yoga, filmske večeri i traženje gljiva.

Ako sebe smatrate osobom koja se bavi društvenim promjenama i koja je aktivna na tom polju, ono što vam je potrebno da bi ste se prijavili na kamp je sledeće:

- ▶ Da imate od 18 do 35 godina
- ▶ Da ste BiH državljanin/državljanica
- ▶ Motivaciono pismo – zašto želite učestvovati na ovom kampu

Vašu prijavu možete poslati do 25. maja, na mail adresu mgrujic@hcabl.org.

Broj učesnika/ica na kampu je ograničen, a odluku o konačnom izboru donijeće Komisija koja će biti formirana u tu svrhu.

VAŽNO!

Imajući u vidu epidemiološku situaciju u zemlji, svi učesnici i učesnice, te predavači i predavačice će biti testirani na Covid-19 prije kampa. Samo osbe čiji test bude negativan moći će učestvovati na kampu.

Sve troškove kampa i testiranja snosi organizator – Helsinški parlament građanja Banjaluka, uz podršku Američke ambasade u BiH.

hcabl.org



Dragi prijatelji,

Ukoliko ste zainteresovani da se u mjesečnom informativnom biltenu Omladinskog resursnog centra (ORC) Tuzla i Omladinske mreže Bosne i Hercegovine objave: vaši pozivi za zajedničke aktivnosti i saradnju, informacije o aktivnosti, konkursi za radna mjesta, apeli za pomoć ili podršku, saopštenja za javnost i svi drugi nekomercijalni oglasi, možete se javiti na jednu od dole navedenih adresa.

Rok za dostavljanje informacija za svako naredno izdanje je 30-ti u mjesecu.

Adrese za slanje vaših informacija za mjesečni bilten:

Omladinski resursni centar Tuzla

**Hadži Bakirbega Tuzlića 1
75000 Tuzla**

tel/fax: 035 258 077

e-mail: orcuzla@bih.net.ba

*Mjesečni bilten uređuje
Omladinski resursni centar -
ORC Tuzla*

Urednik Biltena:

Mirela Biković

Prevod Biltena na

*engleski: **Adnan Karamujić***

WEB stranica Mreže:

www.omladina-bih.net

Mejling lista Mreže:

posta@omladina-bih.net

Webmaster:

emir.delalic@gmail.com